

四庫全書

集部

欽定四庫全書

集部  
紫微集卷十三  
六

詳校官庶吉士臣瑚圖禮

主事臣呂雲棟覆勘

欽定四庫全書

紫微集卷十三

宋 張嶠 撰

制

武義為與翟興軍兵接戰收復陝城轉忠訓郎  
換給薛道為措置牛十八等賊馬有功轉成節  
郎又措置趙常賊馬轉保義郎換給杜遠為照  
管關隘捍禦賊馬并兩次殺散逆賊等轉保義  
郎換給張蒙為捕捉羣賊易當世立功轉一官

吳青為收捉叛賊黃先等賊馬轉承節郎又與  
金人見陣轉成忠郎換給制

爾頃以捕賊有勞應賞申錫書命祇服官榮

王世昌為首先乞歸正本朝與轉一官合轉承  
節郎制

勅爾淪陷既久不忘秦聲嘉其反正之忠俾與褒陞之  
寵益思勵勉以報國恩可

李岳為因父李弼陣亡初補承信郎次因金人

侵犯三泉縣應副宣撫使司一行軍須最為宣  
力轉承節郎換給制

爾父頃死吾事未爾恤也今併舉爾給軍之勞以施寵  
獎其祇明命思報國恩

蒲彥為措置捉殺王闢郭守忠賊馬收復歸州  
了當等立功轉承節郎換給制

勅具官某頃以捕賊有勞陞秩武列有司按狀申錫命  
書其祇服無怠可

郝致和為父仲與金人迎敵陣亡特補承信郎  
後因差充良家子隨軍勤勞訓閱不易轉承節  
郎換給制

爾父沒於行陣賞延及爾復因勞勩進陟武階申錫命  
書毋忘勵勉

林景廣東潮州海界有賊船作過本州遣使臣  
林景部領戰船追捕各得寧息承信郎上轉承  
節郎制

乃者盜發海濱里閭告病爾職討捕遂有成勞嘉其功庸可無褒命祇服官列益懋乃心

朱懋為殺獲興國縣兇賊首王大老等轉承信

郎制

勅爾頃以捕賊有功應賞祇承明命毋替爾勤可

余齡為招到賊首夏德等有勞轉承信郎制

勅爾以招徠盜賊有功應賞秩以武階祇承毋怠可

謝才為掩殺桑仲賊馬轉忠訓郎掩殺李成賊

馬轉秉義郎換給制

爾頃遇寇禦亂三戰皆獲有司第勞驟進階列其申書命以示恩榮益勵爾圖思所報稱

王仲為因自南路將到吳介蠓書兄王武認得更不開拆將王仲同書申送官偽齊稱王武委是忠赤轉武翼郎偽齊禁勘王仲隱諱不得將仲免死決脊杖二十送北京編管到東京趨走經由陝府以西脫身兵部稱王仲已因隨統制



姚仲迎敵偽官并往偽地王武處幹事忠義為  
國理宜優賞轉忠訓郎閤門祇候制

爾兄事偽得書不發示無貳心且致爾於重刑而不恤  
爾心許國既懼凶害益堅忠赤卒脫身於賊而不悔逆  
順之相遠乃如此夫爾之節可以無負如爾兄之行雖  
狗彘之不若也有司按狀兼舉舊勞併為爾寵其進陟  
於武階且服官於上閤將使天下知忠善之有報也

張守約因黔州團結義軍應副宣撫司使喚依

期起發在路無擾轉忠訓郎制

勅爾頃以有勞秩遷官列申錫書命無替爾勤可

陳之道為生擒賊首鄧慶及斫到龔富首級及  
生擒次首領共一百九十三人轉一官比類合  
於階官上循兩資楊志招為與莫公晟賊衆鬪  
敵掩殺逐次斫到賊頭三級及殺死賊人不知  
其數轉忠訓郎制

勅爾以少吏擒盜有勞俾進階資用酬勤勩可

綦辛為奉迎車駕至南京登寶位了當坐甲有  
勞轉忠訓郎換給制

勅爾累以功效屢進官階申放書命往其祇服可

毛宏為招安張清及掩殺賊首趙海等賊節次  
立功轉忠訓郎換給制

勅爾以招捕羣盜屢進武階申錫命書祇服無怠可

李彥明昨捉獲劉超賊徒立功便宜轉官給到  
尚書吏部公據本部照得本人付身竝係真命

合轉忠翊郎制

勅爾曩迹捕羣盜有功中率有司按狀當酬爾勞錫以  
官榮申放書命祇承恩渥無或墮渝可

張貴為管押生擒到番寨中一行人等到行在  
與轉一官合授忠翊郎制

勅爾護送俘囚致之行闕迹其勞勤宜有褒優往其祇  
承益勤乃事可

李綸因掩殺叛賊李忠授承信郎譚敏修為與

王闢賊馬鬪敵獲功於進義副尉上轉四資授  
承信郎徐西美為歸州捍禦桑仲等賊馬轉忠  
翊郎又因殺王鐵鎗賊馬轉忠訓郎換給龐宏  
為殺叛賊桑仲等賊馬轉忠翊郎又因殺捕叛  
賊李忠等轉從義郎又因捍禦桑仲轉脩武郎換  
給董禮為殺董先叛反等人兵等轉成忠郎又  
因商州與賊對壘出戍捍禦轉忠翊郎換給制  
勅爾項以捕賊有勞應賞申錫書命祇服官榮

馮大昕因任黔江縣日因玆州夷人駱旅作過  
攻圍州城調發本縣義軍應副解圍了當改轉  
右宣教郎制

勅項者小夷跳梁敢侵邊徼爾率衆赴難城守無虞載  
稽功庸宜應遷序祇承明命益勵爾圖可

鄭俊等併差出幹事各與轉一資制係楊沂中  
奏

勅爾各以勤勞見知主將俾加恩獎無怠夙宵可

劉元等二十三人為懷忠守義思慕朝廷前來  
歸正各與轉一官資制

勅某等淪陷異域有年數矣而能懷思其舊越吟不忘  
有嘉反正之圖宜畀官榮之寵尚精忠愨以報國恩可  
張恣為掩殺虔賊減二年磨勘係右迪功郎比  
類合循一資制

爾以文史預詰盜之功甄序官資用為爾寵尚勉之哉  
右迪功郎陸釜循一資制岷縣尉比較茶增賞

摘山之利以豐羨計功汝既應格宜有加賞

賈叔願為院慶等結集作過措置頗有勞效循

一資制

勅盜發外區慮其侵軼有司捍圉爾與有勞服我恩榮  
益圖稱效可

陳發武岡縣承右文林郎盧棫武岡知縣右文

林郎孫鎮安撫司屬官左從事郎循一資制

勅乃者盜發湖湘里閭廢亂將吏撲討遂有成勞爾等



佐其發興與有勞績視成行賞以勸爾勤可

李楫為掩殺叛賊史斌生擒到偽第五將王晟  
轉一官比類循兩資制

勅爾以文吏而有武功有司閱實具應賞格申錫命書  
往其欽承可

李棫祖大亨劉孝傑竝係金人侵犯順昌府守  
禦官各循兩資制

勅具官某間者順昌被寇城守之勞爾亦預焉稍以敘

陛用示初獎尚思勉哉可

蔡孟容為乞將生擒賊徒李敦仁功賞於階官

上轉行奉聖旨循修武郎制

勅爾頃從大軍擒捕劇寇宜膺賞典仍畀文階祇服恩  
榮益思報効可

趙玠先任秦州士曹日被賊驅擄自敵中前來  
歸朝循左儒林郎制

爾遭罹寇禍頃見繫以囚俘間關土思卒自拔於夷落

迹其趨舍宜有褒嘉申錫命書以為爾寵毋忘飭厲自獻于時

趙澈番人侵犯楚州當時與賊鬪敵立功之人循右從事郎制

勅爾頃以成厥勞能甄予官榮以為爾寵尚勤乃事毋怠後圖可

蔡長民為殺獲馬吉等循右從事郎制

爾頃在兵間清潔羣盜與有勞焉其服恩榮益自勉勵

安世用係點檢醫藥飯食昨因金人侵犯數內  
立功人與循右承直郎制

鄉者敵人攻圍穎尾城守之役汝與有勞甄序之恩祇  
服無怠

楊光凝係左修職郎湖北京西宣撫司准備差  
遣節次與烏珠等見陣皆獲勝捷合循兩資吳  
師中事同前循左承直郎制

勅朕推轂將帥以宣閫外之威佐其發興亦賴幕中之

士乃者郟城之役爾預有勞秩以官榮用示勸獎可

牟彥為番人齎到文字要壽春府投拜衆官等  
不肯順番死守府城竝轉一官選人比類循右

### 修職郎制

向者強敵傳檄壽春爾等守義一心有死無貳忠壯之  
節宜用褒勸進官一列以示恩榮尚皆勉之益圖稱効  
趙幹為討捕兇賊黃文等有功轉一官選人比  
類循右從事郎制

爾以文吏而有武功有司閱實具應賞格申錫書命往  
其欽承

孫繹為前權房州司理日將俸麥折請秬粟米  
等降一資制

爾不自檢飭遂詔吏議奪官一列以示創懲其思刻責  
用自灑濯

蔡連係湖南安撫使撫幹為殺降武岡賊唐明  
有功循三資合授右承直郎制

勅乃者盜發湖湘里閭廢亂將吏撲討遂有成勞錄其  
協贊之力秩以官榮往其祇承益勤乃事可

李英為掩殺桑仲補守闕進義副尉掩殺李忠  
賊馬授承信郎又掩殺桑仲授保義郎制

爾再捍劇寇皆以勝歸有司第勞驟進階列其申書命  
以示恩榮益厲爾圖思所報稱

蘇良翰為任成都府廣都縣尉捕獲賊徒陳亨  
等奉便宜改次等合入官授右承務郎換節制

勅爾以獲盜中率進改京秩申錫命書以為爾勸尚思  
勉哉可

張汝係權京西南路安撫司使喚本路副總管  
王闢輒生叛逆汝節次掩殺收復房州便宜特  
授武義大夫兼閣門宣贊舍人制

勅爾頃隨大軍迫措羣盜與有勞績進秩官榮其申命  
書以為爾勸可

范綜為殺敗賊兵授右武大夫依前貴州刺史



換給制

勅士之赴功每忘軀而急病予之懋賞豈閱月而疇勞  
惟我俊臣尚稽真授申放書命以示褒優具官某結髮  
從戎早登於勇爵將屯固圉累立於尤功惟豺狼莫肆  
於憑陵恃貔虎相資而犄角覽其獻狀寬我顧憂俾陞  
橫列之班遙領兵團之寄尚思懋勉嗣有褒嘉可

吳倫因金人侵犯隴州掩殺金兵及解圍方山  
原等立功授左武大夫威州刺史制

士之赴功每忘軀而急病予之懋賞豈閱月而疇勞惟  
我俊臣尚稽真授申放書命以示褒優具官某結髮從  
戎早登於勇爵將屯固圍累立於尤功惟豺狼莫肆於  
憑陵恃貌虎相資而犄角覽其獻狀寬我顧憂俾陞橫  
列之班遙領分符之寄尚思懋勉嗣有褒嘉可

叅知政事制

朕憂勤臨民懷朽索之在馭宵旰願治懼積薪之將然  
欲濟多難惟賢是務既任一相以總一統類又資近輔

以協贊幾微安得忠信仁篤之才副予左右股肱之寄  
舍舊德而弗用徒當饋以興嗟既得其人庶務斯理具  
官某學問鴻博究天人精祲之微政事藝通達國家表  
裏之要被遇自乎先帝簡拔興於朕躬歷試已詳還觀  
茲久雍容諷議遍叅兩禁之華出入踐更又已十年之  
遠衣冠所屬中外具儀爰以僉諧俾弼予治尚同寅於  
政路用登翼於王家夫周設三公孤棘叅陪於槐序漢  
開二府御史實亞於冢司皆資襄贊之功以底和平之

治譬之作室須又負之衆材譬之為農賴耘耔之庶力  
尚其密勿奚俟訓辭

又

保邦如置器之未安雖係人君之取舍圖難如涉川之  
莫濟又繫所任之否臧朕誦無競維人之詩則思羣策  
以自輔念知人則哲之訓復嗟委任之尤難顧非偉才  
曷膺大用具官其術高王佐望重國鈞出入三朝致主  
率繇於仁義淹回十載得名皆自於忠誠入儀禁路則

廉陛尊出殿藩維則疆場固謝安之未用當世人屬之心東之之尚屈外邦衆惜其老物望所係政庸曷歸曩以間言過失我社稷之鎮今疇衆譽信惟王政事之臣是用召自价藩畀之大政益增封邑并示恩榮明聽朕言以輔台德予欲承祖宗復大業爾則恢反正之圖予欲修綱紀正百官爾則開衆正之路朕方屬卿以建非常之事卿其事朕以信平生之言豈惟予一人垂拱仰成將使我先王應乃懿德

朱勇為金兵侵犯陝西將帶官兵前來應副使  
喚轉武節郎兼閤門宣贊舍人換給制

屬者強敵再犯陝服爾假守支郡自將營屯遠來赴援  
非有漢虎符名也徇國之志可驗於斯載嘉忠勞不無  
褒勸進官聯於武爵叅贊道於帝閭是為異恩往其祇  
服尚圖來効嗣有褒陞

鄭思誠右承事郎知建州建陽縣對移古田縣  
丞為與部民接坐借錢應副船運官鹽不覺察

男盜取官酒百姓鄭坦詐作親戚乞取阿黃銀  
及依隨人吏鄭達應人戶倒死牛請憑令納水  
脚錢直將上件錢和雇脚子送張朝請等及借  
支買筵會食物管待過往官并借支與諸處下  
書人力於寺院内科買公庫糯米依隨押錄王  
補闕借開福寺修殿錢起造鹽倉使用并借官  
米造酒自盜官酒入已特降兩官衝替制

勅爾為字民之吏而乃貪殘自肆以贓抵罪尚何言乎

鑄官兩列以示創懲祇服寬恩無忘念咎

閔俱為差赴宣撫使司交領支降耕牛三十二頭管押赴將其牛節次倒死過二十三頭等降兩官伊重為監造平射弓不合令弓匠將本胎錯磨怯薄就材改作軟弓特降兩官吏信為隊下効用高儀與妻相打令節級用荆棒決本人臂上瘡發身死追三官勒停制

勅爾等或護送孳畜多至斃踏或董作器用不中程器



或笞人過律遂至非命皆從貶奪以示創懲尚體寬恩  
益思毖慎可

王默為不肯追贖田與王洙虛有陳論特降兩  
官其王默係進納成忠郎制

勅爾以資得列武階而敢怙勢欺誣貧弱抵冒不忌理  
無可矜雖更赦令猶不汝置尚從貶降祇服寬恩可

晏勝係涇原將下新立功人比拍事藝特降二  
等換保義郎制

勅爾往在邊陲有功應賞有司按狀尚秩武階申命之  
榮祇承母急

劉公達為將帶人馬前去山東以來招撫探得  
符離鎮南有番人下寨便却衷私到回特降三

官制

勅爾比者受令招撫山東不至職而擅還豈刑書之可  
逭姑從貶降尚體寬恩可

柴斌係武功大夫忠州團練使新知辰州特改

差知唐州岳飛奏斌遷延不赴特降三官制

勅夫平居無事時工為好言以眩衆一旦有警則畏悞無趨事之意此鼠黠之尤者也斌之謂矣褫官三列薄示創懲毋徇爾為更干重劾

李舜元馬子韶為押番人一十九人走失一十  
三人各特降三官制

勅爾護送俘囚道亡過半雖有司迹捕已得而慢令之罪不可不懲姑從降黜尚體寬恩可

洪邦美為効用韓政偷盜人民阿蔡家錢物竝  
不鈐束特降三官制

勅具官某招來之人既隸屬於爾而縱其草竊不禁則  
比與盜盜者何異馬姑從降黜以為不逞之戒尚思  
慎毋抵重尤可

祝永之為元申朝廷乞於對岸江南池州管界  
移治已劄下只於本軍管界內措置今來却於  
行在官散納劄子稱兩淮之民方且歸業若降

移治指揮民間惶惶莫知所向顯見用意二三  
鼓惑衆聽奉聖旨特降三官制

勅具官某比建請移治江南朝廷不爾聽也姑令即爾  
境內保險以便民乃復以為移治非是前後異言皆自  
爾口徒欲歸非於朝掠名自譽法當誅殛然念比年以  
來俗不長厚賢士大夫猶或為爾所為況如爾者足與  
治乎姑奪三官以視遠邇豈為爾懲將使兩淮之民知  
朝廷之意也可



欽定四庫全書

紫微集卷十四

宋 張嶠 撰

制

太尉保成軍節度使楊沂中故曾祖仲臣可特  
贈少保制

勅朕欽柴宗祈以嚴祖考之侑錫福四海以廣上帝之  
仁經略所逮靡不普洽懷生之類靡不闔懌眷吾貴寵  
之臣可後追褒之典其施名命以及曾門具官某曾祖

某秉德慈祥造行醇固潛德不耀垂裕後人東宮調護之地未極於追崇左棘孤卿之聯益隆於等級九原有識歆服予恩可

故曾祖母檀氏可特贈崇國夫人制

勅爾祗禋祀神示燕娛薦獻大宮祖考來格大事獲考既均福於左右之良惠澤四施宜推本其源流之自既已逮曾門之遠顧可遺內助之賢具官某曾祖母某氏順靖以輯其閨門淑慎以修其婦道遂蓄餘慶施及後



昆矧茲廟澤之行可無賁飾之典易封大國尚克嘉之  
可

故曾祖母雍氏可特贈康國夫人制

勅具官某曾祖母某氏躬織紉之勤服圖史之訓溯其  
居有環佩之節動無燕惰之容垂裕後人用襲其慶既  
正小君之號益荒大國之封精識不渝尚知歆賁可

故祖宗閔可特贈少傅制

勅朕惟國家既賴人之子孫以同恤四方之虞可不推

本其欲致尊親之意而寵綏其先哉具官祖某篤厚裨  
身謙恭居職顧順德之行雖勤於沒世而為善之報不  
在於厥身傳導之官益隆於品秩歲時之祀永賁於宗  
祧可

故祖母賈氏可特贈豐國夫人制

勅朕惟祭澤之行既下均於胞翟褒崇之典固無間於  
顯幽本原內助之賢宜霈從夫之寵具官某祖母某氏  
供蘋藻之薦而有季蘭之欽應彤管之詩而鍾靜女之

美四德兼備宜膺令名其即小君之封益荒大國之壤  
尚其精爽知服予恩可

故祖母劉氏可特贈惠國夫人制

勅某氏婉孌之資內宜其族姻慈祥之行密相於夫子  
遂儲百年之慶至於再世而昌有嘉閭則之賢具應追  
榮之典益荒大國尚或能歆可

故父震可特贈少師制

勅朕觀盤庚告戒其羣臣曰古我先王暨乃祖乃父胥

及逸勤茲予大享於先王爾祖其從與享之作福作災予不敢動用非德其中篇曰古我先王既勞乃祖乃父汝有戕則在乃心乃祖乃父乃斷棄汝不救乃死用是知先王之於其臣善則稱其先以勸之不善則稱其先以懼之可不有報哉具官某故父某資材之美足致通顯而齋志不試詒慶嗣人肆因惠澤之施爰舉愍書之典其躋榮於三少以大慰於九原俾爾子孫毋隊厥緒可

故母董氏可特贈淑國夫人制

勅婦人有三從之義服飾則繁其夫國家廣五教之風  
褒揚則因其子屬者大事獲考均釐萬官宜沛湛恩以  
加泉壤具官某故母某氏柔儀婉孌令德幽閒躬采蘋  
法度之防致鵲巢積累之盛併襲餘慶以啟後人其即  
故封益荒大國知氣如在祗服明綸可

故母張氏可特贈永國夫人制

勅具官某故母某氏成其婦訓克謹彝儀溯其雍睦以

宜室家柔正以事夫子可無密印之章用慰寒泉之念  
俾易封於湯邑用益耀於幽泉尚其有知歆予顧恤可  
故妻趙氏可特贈清源郡夫人制

勅朕並賴庶工之力以共濟國家本原內助之資而誕  
施裒渥漏泉之澤何間顯幽具官某故妻某氏行不越  
於閭彛德足書於圖史早以令善歸逢其良極勤勞於  
室家每同甘苦殆良人之通顯已隔存亡用霈恩章增  
其稱謂納書以禴尚克歆承可

妻趙氏可封華原郡夫人制

勅朕褻寵貴近務極優隆矧廟澤畢逮於翟閭顧福嘏可遺其家室具官某妻某氏凝資婉約秉德間幽如桃天之宜室家躬米蘋以承祭祀宜因惠衍以示褒榮益開湯沐之封以耀笄珈之德欽承恩命毋怠相成可

和衆輔國功臣太保護國鎮安保靜軍節度使  
劉光世故曾祖紹能可特追封魯國公制

勅朕欽柴宗祈以嚴祖考之侑錫福四海以廣上帝之

仁經略所逮靡不普洽懷生之類靡不闡澤眷吾貴寵  
之臣可後追褒之典其施名命以及曾門具官某故曾  
祖某天資鷲勇輔之韜略威名震乎敵隣功績藏於盟  
府雖登勇爵未極顯融三世其昌遂躋公保其以曲阜  
之號冠於五等之封若節春秋來慕黍稷施及孫子尚  
永賴之可

故曾祖母黃氏可特贈鄆國夫人制

勅朕修禮合宮天地並况流澤寰宇胞翟靡遺恩加貴



臣既以寵褒其重祖推本內助顧可忽遺其室家具官  
某故曾祖母某氏婉孌之資內宜其姻族慈祥之行密  
相於夫子遂蓄餘慶施及後昆惟爾聞孫實予公保其  
徙高於之舊國昨以東平之大邦以為爾寵尚克嘉之  
可

故曾祖母白氏可特贈吳國夫人制

勅某氏淑慎以修其婦道順靖以輯其閨門正其貌足以  
稱笄珈之飾飭其行足以蓄有後之慶荐膺褒賁已即

封於於越其因故號俾胙土於勾吳欽我恩榮永光厚  
夜可

故祖永年可特追封越國公制

勅朕惟國家既賴其孫子以同恤四方之虞可不推本  
其欲致尊親之意而寵綏其先哉若夫用其力而蔑其  
報及其近而忘其遠則先後本末豈為稱乎具官某故  
祖某少以勇聞懷韜略之秘晚為名將有疆場之功雖  
才器足致通顯然蓄慶以垂後人肆因霈澤之流用舉

追襲之典冠五等之號已賜履於三吳慰九泉之靈俾  
苴茅於百粵歆子特命尚克享之可

故祖母馬氏可特贈韓國夫人制

勅夫榮於朝婦貴於室古今之通義也顧惟伉儷之私  
豈有幽明之間且愍冊既加於祖廟則施恩宜逮其閨  
門具官某故祖母某氏為婦為母不愧於圖史如山如  
河克稱其象服遂蓄百年之慶至於三世而昌復以所  
承上休禰室胙之成國既有此冀方為爾相攸宜其

莫如韓樂尚歆明命即彼新封可

故祖母李氏可特贈唐國夫人制

某氏浣濯以致其儉勤蘋藻以供其祭祀彤管有煒無  
慚靜女之章象服是宜不愧夫人之德克昌厥後為吾  
貴臣爰因惠術之行用錫追褒之命竝珣有耀既正小  
君之名湯沐徙封益荒大國之履惟其精識尚或能歆  
可

故父延慶可特追封楚國公制

勅朕觀盤庚告戒其羣臣曰古我先王暨乃祖乃父胥  
及逸勤茲予大享於先王爾祖其從與享之作福作災  
予不敢動用非德其中篇曰古我先王既勞乃祖乃父  
汝有戕則在乃心乃祖乃父乃斷棄汝不救乃死用是  
知先王之於其臣善則稱其先以勸之不善則稱其先  
以懼之可不有報哉具官某故父某智勇絕倫為國名  
將折衝禦侮用力先朝功伐之高載諸典冊威名之盛  
傳誦在人遂生光世能世其家比禮成於合宮以恤章

而告第昔嘗賜履已荒羸氏之山河今值苴茅昨以荆  
茅之封畛尚啟爾子無忘報予可

故嫡母葛氏可特贈鎮國夫人制

勅某氏成其家室克謹閭儀相其良人致位通顯副笄  
之盛既榮耀於生平湯沐之封益侈大於身後其即小  
君之號益荒大國之履陰啟爾後尚圖顯庸可

故所生母楊氏可特贈鄧國夫人制

勅朕推昔人福不專饗之心既廣漏泉之施念春秋母

以子貴之義俾篤顯親之仁矧乃慈祥實生賢將追崇  
泉壤尚何愛焉具官某所生母某氏欽翼自居靖端率  
下考禋躬之令德固不慚絡秀之賢顧生子之顯融豈  
待著潛夫之論宜推惠術增賁幽扃賜脂澤之封已開  
於成國廣湯沐之奉益大於新邦俾爾後人毋墜乃力  
可

妻向氏可特封秦國夫人制

勅朕聞將受命之日忘其家則夫鑿凶門制閫外者義

不得反顧其私古今一也然君人者既賴其力以之安邊境而救民死得不豐其報哉廟澤之施宜首逮其家室具官某妻某氏出於后族來嬪將門以供先祀則孝而恭以事夫子則柔而正山河之德不媿其服飾婉孌之行能宜其家人既膺成國之封已正小君之號俾放書命增廣封圻遂荒羸秦為之奉邑無忘勸勉之義同肩報國之心可

叅知政事王次翁故曾祖昇可特贈少保制

該係



郊禮  
封贈

朕建廣大之祀既逆釐於三神湛汪濊之恩復施澤於四海乃眷熙事消成之自實惟耆俊顯相之勤用布閔章逮其重祖具官某醇篤之行修於家庭孝謹之風刑於邑里位不配德寂寥百年慶鍾聞孫焜耀一世東宮調護之地未極於追崇左棘孤卿之聯益隆於等級九原有識歆服予恩可

故曾祖母劉氏可特贈崇國夫人制

朕肅祗禋祀神示燕娛薦獻大宮祖考來格大事獲考  
既均福於左右之良惠澤四施宜推本其源流之自既以  
逮曾門之遠顧可遺內助之賢具官某曾祖母某氏少  
服組紉之勤中謹蘋藻之奉迨其晚歲閭則彌修貽其  
後人遂鍾厥慶賁之象服恩既茂於小君胙以脂田寵  
益加於成國俾其後嗣勿替於時可

故曾祖母吳氏可特贈榮國夫人制

某氏粵從大家來嬪冠族早躬婦順則有少君孟光之

懿晚嚴內治則有孟母敬姜之賢惟其闡則之修終遺  
後人之慶載觀具美宜應彤管之褒式昨大邦益峻小  
君之號施及孫子世世賴之可

故祖寂可特贈太子太傅制

朕謁款天地延遐及於百神錫羨祖宗惠澤加乎四海  
相予祀事之懿孰先近弼之良以予報本之心知其尊  
祖之意爰推懿典用賁幽扃具官某祖某秉德慈祥造  
行醇固莅官從政不過於一同之間積善降祥遂彰於

再世之後則篤其慶莫之與京東官傳導之官用申於  
贈祿九原濡露之感少慰於烝嘗可

故祖母趙氏可特贈蘄春郡夫人制

推廟中之澤有畀於胞閭輝翟而尊祖之意惟止於學  
士大夫既以推原其本心而極祖廟之褒宜亦顧恤其  
室家而下追榮之典具官某祖母某氏躬環佩之節以  
肅其威儀謹蘋藻之奉以供其祭祀蓄德不耀慶鍾乃  
孫顯相有成益大其寵已正小君之號爰開大郡之封

尚俾後人封殖厥福可

故祖母丘氏可特贈博平郡夫人制

某氏出自巨室來儀德門躬婉孌以宜家人體順正以成婦道阜同先世實居隱約之間詒慶後人允賴扶持之助刻章告第既正小君竣事均釐益荒大郡惟其冥冥尚克歆承可

故父禔可特贈太子太師制

勅士有懷抱器業簡淡自居脫屣功名飾巾田野歲久

而道彌茂身隱而名益尊正恐事來偏人不得已而後起未閱旬歲遂聞政機原本其來得無所自具官某父某養素山澤名聞京師潛心麟經得聖人褒貶之意教授閭里秉東州邴鄭之學光遠有耀不在其身天命不怡克昌厥後遂生賢佐方資扶危而定傾顧念前人豈可登枝而捐本其因祭澤載刻密章儲副之師益隆於品秩歲時之祀永賁於宗祧可

故母張氏可特贈饒陽郡夫人制

勅朕廣場珪幣所以昭孝息民下恩澤詔書不敢專饗  
獨美眷吾四近之貴寵加三世之褒有如母慈而缺追  
責具官某母某氏山河其德婉孌其容逮事舅姑早奉  
執笄之饋無違夫子有嚴舉案之儀訓教具終閨門載  
睦雖三徙實資於陟屺而重茵永悼於終天可無密印  
之章用慰寒泉之念俾易封於湯沐用益耀於封君特  
節來臨永光廟室可

故妻趙氏可特贈同安郡夫人制

勅婦人有三從之義而榮寵則繫其夫王者施配天其澤而存歿皆錫之福况於輔弼之佐豈無伉儷之私苟禮貌之不登將褒榮其焉往具官某妻某氏體幽閒之德服圖史之規正順以助其夫子則萊氏之逸妻雍睦以齊其家人則文伯之令母雖牛衣之言共甘於隱約而象服之飾不逮於光榮爰因惠術之施益茂飾終之典豈徒慰於泉壤亦以厚於人倫尚其精爽之存當識寵綏之意可



武泰軍節度使劉錡故曾祖玉可特贈太子太

傳制

勅登頌祇之堂膺受多福施配天其澤錫厥庶民顧吾  
制閫之良可後揚親之寵具官某故曾祖某篤厚禔身  
謙恭居里顧順德之行雖勤於後世而為善之報不在  
於厥身遠逮曾孫遂躋通貴可無賁飾之典以為廟室  
之光東宮前傳之官申榮於贈禭九原濡露之感少慰  
於烝嘗可

故曾祖母王氏可特贈大寧郡夫人制

勅朕致力於神既已格三靈之休移福於下又以及四海之遠惟時追責已推重祖之恩逮其室家可後從夫之寵具官某故曾祖母某氏被服女戒飾修婦儀雍睦以宜家人柔正以事夫子深蓄餘慶以施後昆既正位於小君益衍封於大郡光塵如在歆我恩榮可

故祖恂可特贈太子太師制

勅朕欽柴宗祈以嚴祖考之侑錫福四海以廣上帝之

仁經略所逮靡不普洽懷生之類靡不闡澤曠吾貴寵  
之臣可後追褒之典具官某故祖某篤尚詩書之習被  
服仁義之風善譽聞於里閭才器足致通顯齋志不試  
慶詒後昆儲傳之師益隆於品秩歲時之祀永賁於宗  
祧可

故祖母王氏可特贈通義郡夫人制

勅朕惟祭澤之行既下均於胞翟褒榮之典固無間於  
顯幽本原內助之賢宜霈從夫之寵具官某故祖母某

氏柔仁端靖孝愛慈祥為女而教不煩為婦而家以乂  
四德兼備宜膺令名矧茲廟澤之行可無賁飾之典易  
封大郡尚克加之可

故祖母孫氏可特贈濮陽郡夫人制

勅某氏供蘋藻之薦而有季蘭之欽應彤管之詩而鍾  
靜女之美遂相夫子克成其家垂裕後人用襲其慶既  
正小君之號益荒大國之封精識不渝尚知歆賁可

故父仲武可特封英國公制

勅肇禋重屋大祀休成推上帝之仁既錫福於四海廣  
教孝之義以加惠於庶工使顯揚者有報親之心追遠  
者慰濡露之感矧吾良將可後褒親具官某故父某智  
勇絕倫忠誠徇國勤勞王府垂稱塞垣朕遠覽漢唐有  
懷忠烈如辛氏之宣勞於邊圉西平之贊業於中興父  
子繼承焜燿當世以今準古可無愧焉其霈納書之命  
以光劉氏之祧峻寵維師既躋於一品啟封公社益慰  
於九泉尚俾後人封建厥福可

故母薛氏可特贈韓國夫人制

勅朕惟惠澤之行下浸於黎元追褒之文復加於禰室  
豈其內助不與湛恩如是則何以慰人子念母之心彰  
婦人從夫之義乎具官某故母某氏成其家室克謹閭  
彛相其良人致位通顯副笄之盛既榮輝於生平湯沐  
之封益侈大於身後其即小君之號益荒大國之封俾  
爾後人母墜乃力可

故母王氏可特贈越國夫人制

勅某氏柔嘉其德婉孌其容逮事舅姑早奉執笄之饋  
無違夫子有嚴舉柩之儀訓教具修閨門載睦雖三徙  
寶資於陟屺而重茵永悼於終天可無密印之章用慰  
寒泉之念俾易封於湯沐用益耀於褒榮可

故妻薛氏可特贈安化郡夫人制

勅朕並賴庶工之力以共濟國家本原內助之賢而誕  
施褒渥漏泉之澤何間顯幽具官某故妻某氏山河之  
德稱其象服柔正之行克相夫子逮茲祭澤之廣宜應

褒寵之命昇肇開於大郡益峻寵於小君尚其有知歆  
承顧恤可

妻鄒氏可特封信安郡夫人制

勅朕褒寵貴近務極優隆矧廟澤畢逮於翟闈顧福嘏  
可遺其家室其施恩澤以賁柔徽具官某妻某氏秉德  
幽閒凝姿婉孌既笄而承父母能盡於女工執饋以事  
尊章遂成於婦順其錫贊書之茂俾增稱謂之隆象服  
是宜方膺於來寵君子偕老無怠於相成可



欽定四庫全書

紫微集卷十五

宋 張嶽 撰

制

檢校少保潘正夫故曾祖承允可特贈太師制  
勅朕欽柴宗祈以嚴祖考之侑錫福四海以廣上帝之  
仁經略所逮靡不普洽懷生之類靡不闡澤眷吾貴戚  
之良可後追褒之典其施名命以及曾門具官某曾祖  
某處已靖端莅官明恕潛德不耀莫躋通籍之榮詒慶

後人遂膺築館之寵可無賁飾之典以為廟室之光位峻維垣寵加納襪併舉恤章之舊用綏潘氏之祧可

故曾祖母王氏可特贈荊國夫人制

勅朕致力於神既已格三靈之休移福於下又以及四海之廣維時追賁已推重祖之恩逮其室家可後從夫之寵具官某故曾祖母某氏躬魚菽之祭恪謹於春秋服織紵之勤不忘於旦暮深蓄餘慶以及後昆既正位於小君可益封於大國光塵如在歆我恩榮可

故祖孝存可特追封濟國公制

勅朕將以明禋於天地必先有事於宗祧神祇奄虞祖考咸格廟澤之施已浹寰區顧其感畹之良可後祭澤之及具官某故祖某資材畢給蔭藉高華顧順德之行雖勤於沒世而為善之報不在於厥身頃以刻章既極師垣之寵今茲告第遂開公社之榮知氣不忘尚歆休渥可

故祖母孫氏可特贈周國夫人制

勅朕惟祭澤之行既下均於胞翟褒榮之典固無間於  
顯幽本原內助之賢宜霈從夫之寵具官某故祖母某  
氏出於望族來嬪大家禮法之嚴兼資於鍾郝容潤之  
美並茂於山河遂儲百年之慶至於再世而昌象服魚  
軒既正小君之號脂田湯沐益荒大國之封可

故祖母陳氏可特贈唐國夫人制

勅具官某故祖母某氏凝資婉約秉德柔嘉當其事舅  
姑有色養之孝訓諸子有義方之益約素自處詒厥後

人再世而昌有光祖室小君正位已荒荆芊之山川大國徙封更胙叔虞之土略春秋時祀尚侈褒崇可

故祖母趙氏可特贈雍國夫人制

勅具官某故祖母某氏被服女戒飭修婦儀溯其雍睦以宜家人柔正以事夫子深蓄餘慶以詒後昆顧廟澤之已行豈愍書之可後其即小君之號益荒大國之封春秋時祀永賁宗祧可

故祖母江氏可特贈秦國夫人制

勅具官某故祖母某氏被服圖史恪謹蘋蘩當其處富  
貴而無驕侈之風齊閨門而有肅雍之美昨於成國已  
正小君之名荒以大邦益衍脂田之奉惟其精識尚克  
嘉之可

故父絳可特進封景國公制

勅肇禋重屋大祀休成推上帝之仁既錫福於四海廣  
教孝之義以加惠於庶工使顯揚者獲報親之心追遠  
者慰濡露之感其施恩渥以賁幽扃具官某故父某篤

厚裨身謙恭居里深蓄餘慶以遺嗣賢遂襲傳家之休  
以膺下嫁之寵肆頒惠澤爰舉愍書師垣峻秩公社啟  
封併示恩榮以光厚夜可

趙子砥為叙元降一官制

過而不法何以示懲奪而不還何以示勸朕率是道以  
為國典爾頃嘗貶秩亦既滿歲其從甄叙之科復畀官  
聯之舊往祇恩命毋貳厥愆

沈伯達為失叙侵隱總制司錢降一官制

爾司緡錢乃使放散若不舉法情吏曷懲姑禡一官尚  
思愆慎

許良輔為決打女使戴榮奴身死特降一官制  
勅部曲有罪懲之可也杖之至死不亦甚乎其即爾罰  
尚祇寬典可

林衡蘭康伯向子能為兩浙運副黃敦書申近  
准樞密院劄子秀州通判葉棟申准樞密院指  
揮在募湖船遂牒委華亭知縣青龍監鎮在募



績據逐官中本界內從來即無上件平底湖船  
可以雇募申聞事績據本州申雇募到船隻今  
來却稱從來即無上件船可以雇募顯是妄亂  
回申知華亭縣事林衡監青龍鎮酒稅向子能  
奉聖旨各特先次降一官仍令本路提刑司取  
勘具按聞奏制

勅爾等慢令不恪公肆譎辭先奪官階仍以屬吏尚恭  
爾職以聽刑書可

王瑒為闕草喂馬將官草一百束喂馬及公使造酒庫闕少酒材於省倉節次借過年計小麥白米豌豆錢等事罰銅五斤特降一官制

勅爾庀官不飭以贓抵罪若不懲艾尚有重刑爾其戒之可

符思稟為偷盜官錢擅離職守特降一官制

勅具官某職司稅隸出納不謹致有告言離局自匿有司論罪姑褫一官勿以幸免而忘愆慎可

陳正由為臣寮上言特降一官制

勅爾蒙其世闕幸得備使一路不思所以嚴分守厚風俗之義而包藏私憾逞志於人迹其言辭可見妄作抑爾惜不足以知此耶將狡狠而無忌憚也除申已令考按事實外惟爾犯分之過何可不懲姑鐫一官尚寬罷黜益思戒慎無貳厥愆可

王全為驅逐楊德著熱身死特降一官制

勅爾遇下慘礫方其盛夏暑時與衆在道遠其塗而責

不至鞭笞迫趣致人於死若不有罰何以為暴斂之戒  
貶官一列祇服寬恩可

張仲寧為前監小富鎮酒稅務合同場日於本  
鎮上等井戶處人夫般取宅眷及失覺察公人  
商友等取乞客人鋪戶井戶等錢事降一官衝  
替制

勅爾犯法在吏復肆抵讞會逢赦原姑從末減鑄官一  
等祇服寬恩制

宋辯趙汝霖為監袁州萍鄉縣酒稅節次折欠  
官錢及於醋庫節次貸錢助買常令入家及於  
醋錢內尅請逐月合得供給錢例外請過入已  
特降一官衝替制

勅爾等坐贓抵罪會逢赦恩姑從奪官以示懲創益思  
愧悔以服寬恩可

夏奭監井研縣賴藕鎮酒稅為收到稅錢已收  
上都錢厯外不即轉結子厯并盜稅錢買草喂

自己馬并支與欄頭將僧修天王閣材料修辭  
宇并於比較店取洗樓袋哨喂豬於人戶家寄  
養鵝將本務雜用錢一面自行支給俸錢及因  
并研縣丞趙修職親戚張雄飛前來本鎮干索  
夏彙請上戶黃澤等說與因依差所由同去裱  
名紙謁見乞得錢引事被提刑司按發特降一  
官罰銅十斤制

勅爾劾官莞庫以贓抵罪有司按法當以贖論俾奪一

階以示懲艾尚思悔愧復齒平人可

曾懷前知溫州平陽縣為在任日召募壯丁金  
元將蝦乾前去鎮江府本家投下計役過四十  
八日及差杖直買栗子山藥并差耆長於薑戶  
邊買生薑大理寺勘當徒一年餘徒半年更合  
罰銅十斤入官勒停放緣犯在赦前特降一官  
仍依衝替人例制

勅爾為縣令事役人過律且市物有所附益為不飭矣

當抵以罪會逢赦原姑禡一官以示懲艾尚慎之哉可  
陳彥達等係恭州知州為溫濟編管萬安軍到  
州故縱留滯當職官先次各降一官令提刑司  
取勘制

勅奸命之臣宥之以遠所過都邑若稽留不前此屬二  
千石以下所宜察而行法也而乃故縱不問何其無首  
公之義乎先貶厥職俾令按治尚度爾守以聽刑書可  
王挺因葉祚學鄉談相爭打葉祚上齒一角斷



折二分係有戰功特降一官制

勅爾擊人折其齒若不有罰何以為暴桀之戒貶官一列祇服寬恩可

張成大等為温州遺火延燒千餘家成大通判權攝郡事罪不可逃知通兵官各降一官制

勅比者永嘉大火初緣民屋之延燒遂至郡邑一空實坐有司之不職顧萬室重罹於災燁為中宵永念於黎烝爾以郡丞實參寄委不能督趣所部以極吾民初無

濡膜之勞殆同拾潘之喻若無懲艾曷慰人心姑奪官階祇服寬典可

李應趙士霽崔越田冲田沂桂諒並係温州兵官及巡檢并船場官緣本州城外遺火並不部帶兵弁前去救撲以致延燒入城州東一半居民屋宇兼其夜民心驚擾之際致兵士搶奪其縱容受乞錢物各降一官制

勅比者永嘉大火初緣民屋之延燒至於郡邑一空實

坐有司之不職顧萬室重罹於災輝為中宵軫念於民  
氓爾等始或坐視其焚如以致燎原之熾中或徒趨於  
火所僅同拾潘之為至於弗戢盜偷剽奪不忌故縱吏  
卒凶取為姦若不有懲何以示戒聊從薄責少慰民心

井溥係劉相公差作回易因劉相公罷宣撫使  
拘收回易錢為溥名下錢未見下落及虛攤鹽  
舖戶錢特降一官制

勅爾肆行無賴侵冤平民奪官一階姑以示眾如爾者

顧足責哉可

蔣璉因兄琳被阮德強偷盜去木札又妄論宰  
牛等官司追理保正押德強到琳住處琳押德  
強歸家縛打問璉亦為德強盜本家木札遂打  
德強有傷經御史臺陳論法寺稱緣犯在赦前  
合該恩原免奉旨特降一官制

勅爾暴橫里閭當抵罪罰會逢赦令姑奪官秩尚思畏  
慎祇服寬恩可

欽定四庫全書

紫微集卷十六

宋 張嶠 撰

制

皇后曾祖邢允迪可特贈太傅制

勅昔鄧訓多所全活而信家之蒙福翁孺雖坐畏懦而  
知後之有封厯選作合之祥必有流光之自睦吾外戚  
何異昔人肆因大亨之涓成爰舉納書之令典具官某  
居鄉有孝謹之譽為吏有平允之稱顧順德之行雖勤

於沒世而為善之報不在於厥身遠逮孫曾來儀宸極均釐廟澤既周浹於寰區恩隆外親可忽遺於泉壤九原有識尚服予休可

故曾祖母李氏可特贈蜀國夫人制

勅朕稱秩明禋裸獻上及於始祖加惠臣庶追榮遠逮於曾門有加戚畹之賢莫究愍書之贈顧其內助宜沛湛恩具官某曾祖母某氏躬織紝之勤服圖史之訓靖順之德風行於外姻淑均之和克成於內治積善有慶

爰集曾孫乃應覩天之休遂正皇嬪之號即荆河之舊  
壤荒汶蜀之大邦尚服休光永綏宗祏可

故曾祖母郭氏可特贈秦國夫人制

清姿玉潔令德蘭芬服女工之勤惟組紃之是事有婦  
人之德非傅姆而不行深惟坤載之賢實式家齊之訓  
顧合宮之竣事罄率土以蒙休豈無光榮慰彼泉壤其  
易冀方之號遂荒秦土之封尚克歛承永綏曾嗣可

故祖邢宗賢可特贈太師制

勅朕將明禋於天地必先有事於宗祧醴格在庭嘉奉  
璋之有翼衮冕承祀歎元統之莫供顧其大父之親可  
後祭澤之及具官某祖某儒雅自奮少憑文吏之茵官  
學知名晚從大夫之後德雖積而不耀慶既久而乃彰  
儲祉發祥既已受神明之况布德施惠宜益隆肺腑之  
恩位峻維垣寵加納遜併舉恤章之舊用綏邢氏之祧  
可

故祖母侯氏可特贈韓國夫人制



勅朕定宗廟儀法隆竝侑之文下恩澤詔書舉追賁之  
典既已徧於寰海豈或遺於外親爰推茂恩以廣祭澤  
具官某故祖母某氏躬魚菽之祭恪謹於春秋服織絰  
之勤不忘於旦暮居有佩環之節動無燕媵之容積茂  
閭儀遂光奕葉筭珈象德既荒吳地之山河湯沐徙封  
更啟韓侯之土宇尚歆令典相爾後人可

故父邢煥可特追封楚國公餘如故制

勅國家恩隆外親褒崇后父用漢家之故事或謂過元

舅之尊考春秋之舊文則當大紀侯之國豈有惠術之  
布而遺左戚之良具官某故父某蔭藉高華資材畢給  
初儀從列有論思獻替之稱晚建節旄賴固圉折衝之  
略豈顧弛張之或異蓋由文武之兼資壽止中身慶鍾  
椒屋廟中之澤或下及於輝胞福祚之登顧莫先於肺  
腑維垣峻寵遂冠於周行南國啟封更荒於賜履尚歆  
渙渥永亢宗家可

故母熊氏可特贈魏國夫人制

勅朕追維代邸之舊孰先故劍之思雖苜蓿之求本資  
於窈窕而禕瑜之飾未及於深嚴念其母慈可無追賁  
肆均享帝之福用廣漏泉之恩具官某故母某氏秉德  
幽閒飭躬柔正奉順君子色不形於燕私輯和閨門言  
不踰於閭闔篤生令女實處中闈已正位於小君更啟  
封於大國笄珎有耀湯沐增畬尚其淑靈歆承惠澤可

陳楠除修撰宮觀制

出守雄藩既聞報最退游真館力欲祈閒可無渥典之

頌以寵從臣之舊以爾氣和而裕器達而閱早聯禁橐  
之班荐剖竹符之任一麾邊壘兩歲班春方倚其卧治  
之功而遽有奉身之請即琳館優閒之樂陞書林論譔  
之華徃體眷懷毋忘猷告

擬觀文殿大學士提舉江州太平觀制

賞罰不廢於國所以示懲勸之方春秋責備於賢所以  
明褒貶之大我有成命庸昭至公揚於大庭以儆羣聽  
具官奮身孤遠有志事為蘊功名進取之圖厲邁往直

前之氣蚤策勲於廟社遂登冠於樞機旋以疇庸繼升  
次輔內總百揆外制六師志求遂而忘力之未能功求  
成而昧時之未可務專行於己意率弗用於衆謀裕中  
國而撫四夷朕雖聞於爾志好戰功而輕百姓人久議  
於汝為且列戍於淮瀆以備防於江許比者易置主帥  
遷移師屯為謀不臧衆逃其上致封章之驟至豈衆怒  
之能任一青掩功雖非朕志為法受責在汝無難爰舉  
憲章以明懲艾其解機衡之任徃均恬逸之休猶加寵

名用全體貌嗚呼誦清人亡師之什宜高克之必奔考  
采繁用德之言或孟明之可赦雖爾身之在外諒報國  
之未忘勉思令猷以圖晚蓋

李昉直龍圖閣宮觀制

延閣河圖之峻先皇奎畫之藏用待俊游時為異選以  
爾提身於學飾吏以儒入聯卿棘之班出領郡麾之寄  
備宣勞効力丐優閒爰陞綠字之華勉狗真祠之請往  
祇錫寵毋怠告猷

詹大方工部尚書制

總領衆務八座憲文昌之星疇若予工六官列起部之  
長顧欲求賢而試可曷如任舊以視成具官悃幅無華  
剛毅有立休著純明之譽亟躋清近之班騎省七人知  
諫大夫彌縫之益烏臺五院肅中執法彈擊之威逮司  
繕修克彰物采屢披封奏均佚籥符會稽方倚於買臣  
宣室忽思於賈誼趣歸法從還秩冬卿惟器械之備歌  
於詩而技巧之精紀於史皆述中興之美往圖率屬之

勤雅存定規寧俟多訓

工部尚書制

朕惟一人之身資百工所能甚備故六官之職任起部以典五材因其技之苦良用考時之治否故周家復古詩稱器械之修漢室中興史紀技能之飭疇咨練達之士以掌予之工正庶幾製作之善可追蹤於古人具官某早以言揚中膺德選克勤小物驗於履屐之間能治大官可語繩墨之外入叅禁近屢有畫規出總州藩居



無秕政茲叅稽於衆論俾進長於冬官爾其度奢儉之中脩國家之用制器惟期於取具斂財無至於傷民若虞舜之工尚克追於前哲廢司空之職當思戒於漢臣懋修爾官無忘朕訓

刑部尚書制

朕惟政治視民而寬猛刑罰以世而重輕懼其不辜而過及於善人故君子姑欲其寬若其能協於中不失有罪則天下何嫌乎病昔以西漢承嬴秦網密之後人不

聊生故主父溫舒建恤刑之議於世宗之朝東京承元  
哀刑輕之餘人易犯法故梁統崔實立尚猛之論於中  
興之際伊欲寬不失於廢法而嚴不至於傷恩必推明  
恕之才寄予欽恤之任具官資材肅給學問淵深入侍  
燕閒屢罄謀猷之告出居方面益聞課最之優以其經  
明有威必能平亭於古誼以其文深無害必能悚懾於  
吏姦方今廢亂之餘姦宄不禁得其情而勿喜其益務  
於哀矜折其獄以片言尚無忘於明慎勿使臯蘇之美

獨為簡策之光往宿其官毋隳乃力

行御史中丞制

朕惟四海之大萬務之衆既任股肱之佐以相予裁決  
庶政又置耳目之司以助予臨照百官不特糾繆繩愆  
以肅清乎綱紀又將去煩宥善以競勸乎士心貴如鹽  
梅之協同無取琴瑟之專一戮力以濟迄用有成而比  
年以來士無特操俗不長厚或交私而順指或激訐以  
釣名將振起於古風必諮諏於正士以爾具官某執德

彊毅秉心粹夷道誼足以格君心之非廉介足以立懦夫之志匪利回而義疚不吐剛而茹柔使之丞御史之嚴必能重風憲之地噫善人登用則朝廷自尊朕以謂德之化人如麟鳳之服猛鷲威之肅物若虎豹之衛山林其惟二事之兼足為羣吏之表往朕命毋怠厥官

兵部尚書制

國家有四方之虞天未厭亂察五材之用誰能去兵是用討軍實於閒暇之時脩武經於朝廷之上若根本強

固則威聲自振伊欲紀律脩明少長不犯雖統辟之任  
屬之於主師而紀綱之振實自於中臺疇咨列位之良  
俾為司武之長具官某以仁者而輔將相之謀以書生  
而習軍旅之事久更要任鬱為名臣造膝從容每建治  
安之策偃籥整暇寬予疆場之虞會報政以造朝屬夏  
官之虛位匪待一人之譽司予九伐之威考周之書司  
馬掌邦甲兵之政驗詩之雅圻父為王爪牙之臣蓋古  
列卿實當是任爾其宣明德義訓飭帥屯申警戎行奮

揚威武是惟任職汝則有辭

王勝為收復海州除正任觀察使制

朕十年生聚導迎恢復之期千里折衝允賴神明之將  
乃者遣偏師而薄伐陷堅壘以成功獻狀既聞疇庸敢  
後具官某忠誠許國騎射絕人結髮從戎功寔高於百  
戰忘軀赴難勇常冠於萬夫顧彼孤城敢抗吾旅數門  
闔而視暇氣已無前濡馬褐以救焚敵不及拒既掃金  
湯之險致俘訊馘之多載嘉顯庸宜膺懋賞俾正觀風

之任上還宣化之章往體褒優益思奮勵

橫行帶承宣觀察防禦制

朕惟國家世脩其德而狡敵日載其毒彼寇暴中國幾於坑三十萬衆以痛秦父兄而朕閔餘民每思捐四千戶封以慰趙子弟故德虐之分乃卒驗於天定之後而忠義之士亦終遂其報國之圖可無褒優以勸義烈具官某以沉毅之資行共用之勇出入行陣所向無前忠勞國家始終不變果有功而自著知有志之必成觀獻

狀之殊尤宜書勞於異等俾正任於橫列且遙領於流  
行其祇滿溢之恩更勵非常之報

岳雲為與番人接戰大獲勝捷除左武大夫遙  
郡防禦使制

勅師以勝歸策勲於廟禮也若夫成功行封猶有遺者  
何以為勞臣之勸哉具官某大帥之子能以勇聞比從  
偏師親與敵角刈旗斬將厥功為多顯賞未行殊非國  
典其陞庸於橫列且遙領於捍防益務忠勤無墮乃力



可

王德田師中為張俊提統前去應援順昌府及  
收復宿亳州並除正任承宣使制

勅比遣大將往修封疆立功而還具以狀獻宜放書命  
用獎勞能具官某等拔自鴈行居多誕節知勇自見屢  
收不戰之功果毅敢前若踐無人之境逮茲一出遂以  
勝歸具正任於承流以耀明於武略尚圖來効期稱國  
恩可

范冲為臣寮上言稟傾邪之資肆貪墨之行落

職依舊宮觀制

勅朕進拔人才以為侍從冀收其用也而功效不著隱  
匿暴陳猶務優容以蒙其過至於責言來上復何敢私  
具官某名臣之子趨操不端早交結於左貂信蹤跡之  
詭秘晚依附於時宰通權顧之金錢欺愚自同於今人  
考行難逃於清議姑從末減俾麗寬科其鑄延閣之華  
尚食真祠之奉毋忘念舊以重悔尤可

王居正為臣寮上言天資凶悍學術迂踈好文  
姦言以欺世俗落職依舊宮觀制

勅某迂踈自任惡戾為資依倚權臣公肆豪奪暴妾其  
耦不以仁恩驕縱恣睢好行凶德顧造行之若此豈清  
議之可逃尚矜重劾之加姑俾寬科之麗其錫華於延  
閣仍受稟於真祠祇服明恩無忘念咎可

劉岑為臣寮上言先次落職與宮觀令於隣近  
建昌軍聽候指揮制

勅朕愛惜民力深戒妄費故掖庭無見親之賜近習無非時之錫欲迪在位率由儉德以寬元元衣食之奉焉具官某為吾近臣職司牧養所為不度施予自恣斬艾民力所至為空責言來上良用慨然姑鐫延閣之華尚食奉祠之祿俾居旁近以聽有司民政所關朕不得而私也

范直言為臣寮上言落職與遠小監當制

勅頃者臺臣言爾甚醜朕越拘攣之議不汝瑕疵起於

棄廢之中擢之居卿之列甚厚而不圖報稱顧乃選悞  
畏避便文自營何其無竭節首公之義乎責言荐至殊  
乖委任若置不問何以使人其免所居之官兼錫寓直  
之職宥汝以遠往其思愆筦庫雖卑尚食廩祿吾之遇  
汝不為無恩也

霍蟲為擅離職守及收饋送特落職令吏部與  
監當差遣其饋送歸還

勅吏之交通貨賂與夫畔官離次皆部使者所當謹察

而舉法也顧乃身自犯之復何賴焉爾頃從閒廢擢備外臺奉使失指一至於是其錫職於內閣且左官於筦庫以示懲創益思念咎母貳其尤朕之於人亦不終棄爾尚勉之可

梁揚祖為措置擒捕虔吉州盜賊今已盡靜除

顯謨閣學士制

勅潢池詰盜既收方面之功循吏著稱宜用增秩之典載之盟府行以贄書具官某蔭藉高華材資畢給初從

行於天下居多負綫之勞逮法從於甘泉益振侍臣之  
譽深通明於吏理克紹績於家聲睠此江西久離寇攘  
吏唯憂於坐課但肆謾言賊率用於文降未嘗自出爰  
資敏政輔以兵威取彼凶渠破其姦橐里閭安堵枹鼓  
稀鳴曾無旬歲之間盡去積年之害載嘉獻狀宜賁恩  
章升華學士之班增重价藩之寄令行禁止既嚴連帥  
之威稜俗易風移尚慕古人之條教益殫夙夜以惠黎  
蒸可

陳楠韓世忠奏為與金牌郎君迎敵自淮陽城  
下差委去湖陵千秋同共措置逐次獲捷欲乞  
除落過其元帶貼職詳察施行奉旨右朝請大  
夫叅謀官依舊右文殿修撰制

勅憺威於境固資闡外之良揆策於軍亦賴幙中之彥  
爾頃詒吏議名在刑書荐歷歲時既從昭雪逮此偏師  
之出具宣贊畫之勞宜還論譔之華以示褒優之渥尚  
殫夙夜益茂遠圖可



宋萬年為金人侵犯糾集軍馬竭力保捍敦減  
過官依舊給還仍差擢知慶陽軍府兼主管經  
略安撫司公事節制鄜延環慶路軍馬換給仍  
陞除直顯謨閣制

朕惟強敵入寇自非智者獻謀勇者出力以逆折其鋒  
曷能有濟哉爾奮身儒學擢任邊瑣糾合義旅為國保  
民大帥上功三復嘉歎陞華延閣用勸忠勤尚懋爾圖  
以底成績

小使臣帶閣門祗候制

朕惟陝服河外淪陷積年忠義之徒未嘗忘漢果侯可  
為之會皆立昭明之功覽獻狀之沓來顧疇庸之可後  
俾進秩於武列且庀職於九閣益厲爾嗣膺褒陟

牛寔為措置捍禦賊馬保守宿州備見宣力忠  
義可嘉特除閣門祗候兼殿前司選鋒軍將官  
依舊添差宿州兵馬鈐轄純制本州管內諸山  
寨鄉義民兵制

勅符離今最被邊容邇仇讐為朝夕釋憾之地朕念其  
餘民不忘日夜爾能糾合義旅全父兄之親見忠勇之  
節可無寵獎以厲其餘俾庀職於九閭兼將屯於七萃  
益思奮發嗣有褒陞可

正使帶團練刺史閤門宣贊舍人制

士夫所重者節義國家所恃者人心懷節義以立功名  
其何不濟因人心而圖恢復亦將庶幾覽觀獻狀之來  
殊契予衷之素其敷贊命以勸勞勤爾等振從行伍之

中深明逆順之理秉心忠壯立義不侵遂厲良圖以有殊績其貫秩於諸使仍遙領於兵團祇服官榮嗣有褒陟

給事中制

朕欲發號施令舉皆得百姓之和亦惟論議之臣有以補官政之闕東臺瑣闥出納是司與其已行而病民孰若未行而錯議苟愆令之盡舍則善治以何難思得其人付之此職以爾具官某稱道不倦守學彌惇通達古

今之宜練習兵民之故封駁之任僉曰汝宜爾其審朝廷命令之否臧察有司請事之當否以同異相濟於省戶之內俾德澤遍及於海隅之間思業其官無廢朕命

趙不棄知臨安府制

王畿之畫千里京邑之宅四方朕於駐蹕之區視若上都之重擇守有同於尹正疇咨慎簡於賢材具官某屬藉之英幹局之敏荐更事任備著勞能江左九州幹漕臺而佐國坤維萬里覈軍餉以寬民趣歸亞卿之班亟

寘從臣之列顧冬官營繕未究設施之長惟天府浩穰  
政須彈壓之治用擢陞於次對仍兼率乎十連使鉅筭  
屏於姦蹤而桴鼓徹於盜警與古無愧則予汝嘉

張澄知襄陽府制

襄陽馭郢之北門禹貢荆湖之南境膏腴沃野脣齒重  
湖朕思求侍從之良以穆蕃宣之寄頒我寬詔協於疇  
咨具官某智警而明氣和而裕聯清班於八座有蕙節  
之四騏久持橐於禁塗屢攬麾於名郡自游真館簡在

沖懷念償麥之風可鑒於昔賢而澆瓜之好宜敦於邊  
壘徃莅一麾之守兼分十國之連載剖藩符固吾疆圉  
勉圖後效祇副寵光

汪名嗣知潼川府制

具官某朕思民丙夜欲其田里之安擇守坤維付以藩  
宣之任以爾緣飾吏事通達民情紆郡綬以拊綏有嘉  
惠術馳使輶而將漕克著賢勞眷言梓潼遠在劍蜀往  
布惟良之政庶分廼顧之憂勉服訓言益圖報効

張達為男中孚奏先父達於靖康二年勤王殺  
敗金兵又隨解潛應援太原奮不顧死遂至戰  
沒特加贈開府儀同三司制

朕嘉致果之烈而高勇爵之科悲死事之臣而厚飾終  
之典其有紓忠疆場隕命戎行未加隱恤之恩曷盡褒  
崇之意具官某稟山西之驚勇龍將種之餘風貫總韜  
鈴便習騎射早繇疾戰屢多傳校之功遂以勇聞累賜  
上聞之爵乃眷靖康之末嘗興奔命之師速戰南關頗



聞嘉績至解圍於大鹵倏遭難於顏行尋王室之方騷  
致遺忠之未錄茲由冢嗣具列前勞深慨予衷遂疏恤  
典俾視儀於三事用追賁於九原

翰林學士制

司訓告於嚴近期以鼓動四方備顧問於燕閒期以彌  
縫庶政自非學業之茂兼討論潤色之工智慮之深通  
國家表裏之要則何以重高門之地稱內相之名具官  
某有太叔之文而行之以敏有叔向之智而濟之以通

中外踐更風望彌幼雍容諷議補益洪多掌誥西垣綽  
有除書之譽續綸黷禁益觀掌制之工方今國家多虞  
機務至重聘問交於隣國號令達於四方式資深厚之  
文彤予惻怛之意庶幾河東之癘老扶杖而往聽河北  
之悍卒感泣以草心若夫辭令之修賢於甲兵之用故  
子產戎服將事文伯不能詰孔子則謂其文辭為功壞  
垣納車趙孟不敢犯孔子則謂其諸侯是賴古之立國  
夫豈一端勉思昔人以稱朕命

欽定四庫全書

集部

紫微集卷

十七至  
二十

詳校官燕吉士臣瑚圖禮

主事臣呂雲棟覆勘

騰錄監生臣陳 遂

騰錄監生臣雷 林

欽定四庫全書

紫微集卷十七

宋 張嶠 撰

制

進武校尉至守闕進義副尉制

朕惟陝西河外淪陷積年忠義之徒未嘗忘漢卒皆自奮以報國家用敷錫於贊書俾登秩於七校尚有好爵爾其勉哉

張九成為臣寮上言落職依舊知邵州制

朕務推大德加厚庶工雖愆過之已彰尚優容而未替  
既國言之不置豈朕念之敢私以爾早首俊科旋參法  
從義當報國而出處乃視於權臣名為好修而趨操務  
欺於愚俗日緣邊警妄肆違言陰遣朋徒鼓惑羣聽既  
非公義奚道寬科其鑄論撰之華尚俾民社之寄往圖  
循省毋重悔尤

擬除萬壽觀使兼侍讀制

朕惟為政務在擇人則取真賢而任翰藩之寄建事學

於古訓則思鴻儒而備左右之諮  
繫我舊德之良久爾宣  
勞於外宜趨鋒車之召以陪宣室之釐具官某稟悖大  
靜重之資蘊高明疏通之學鎮定大事而不撓和寧百  
姓而允懷頃者登弼諧輔佐於一時粲然有號令文章  
之可考民風近厚物論歸仁乃大丐於均勞諒重違於  
雅志去朝旬歲具聞報政之孚渴見儀刑乃下賜環之  
命用符屬望亟俾旋歸處之真館之優實賴多盤之益  
噫職以講讀為業蓋將聳德誼以輔予位雖榮秩之安

夫豈忘謀謨以佐治時惟舊輔寧俟訓辭

沈該權禮部侍郎制

文昌庶務之宏綱宗伯六官之要選典司禮樂之重推  
擇卿貳之賢艱厥疇咨得於僉允具官某材猷練達器  
度寬洪稽匠監之簿書撫邊城之封守淮堧總計將輸  
備見於通融天府臨民威惠不專於彈壓爰擢居於法  
從俾攝副於儀曹惟神祇廟社之嚴祠及文物聲明之  
盛制煥焉可述時乃之休

高百之直秘閣制

蓬萊道家之山東壁圖書之府故秘閣寓直時為清選以爾戚畹英俊恪實有聞舉以授之蓋廣恩也往欽異數思稱所蒙

員法為用妻父陣亡合得下班祇應恩澤比類轉一官授保義郎換給制

勅爾以外舅死事流貶見及有司引類用進官階申放書命祇服恩渥可



高好古為該建炎元年五月一日覃恩轉進武  
校尉并因磁州守禦無虞隨宗澤勤王有金人  
侵犯開德府率先用命殄滅強寇轉承信郎紹  
興元年終賞轉承節郎紹興二年終賞轉保義

郎換給制

勅爾積功累日屢進官階申錫命書無忘報力可

孟詮元係保正因掩殺桑仲賊馬立功節次轉

成忠郎制

勅爾頃以捕賊有功應賞申錫書命祇服官榮可

楊勲張曼為隨張浚至川陝道塗萬里備見忠  
勤轉成忠郎換給制

頃者大臣宣慰關陝爾實從行例進一階以酬其道路  
之勤往服恩榮毋墮乃力

孫師望初補進武校尉日因事除名勒停至紹  
興元年敘復因隨宣司措置邊防事轉一官授  
承信郎三年五月隨中軍正將前去興元府招

誘金人轉承節郎又因勤勞訓閱轉保義郎五年隨吳璘弓門寨與偽賊戰立功轉成忠郎除敘復進武校尉付身外合給今來付身制

勅爾以積功稍遷官列申放書命以寵爾勞尚思自竭毋墮乃力可

戶部尚書制

朝廷遭兵革之運猶未間於憂虞黎元被仍興之勞蓋已蕭然煩費某官少以文學為官知古今之宜中以名

字典郡通政事之務出入中外興起事功知無不為所至稱治樵悴事國多夙夜之勤寬裕柔民流愷悌之譽顧其更踐之久與夫績用之嘉爰以僉階超登大計昔桑宏羊建均輸於漢而見疾於當時劉晏總計務於唐而得名於後世迹其毀譽之相遠論其時世而可知今之廢興豈其獲已顧天未厭禍雖未能以蠻夷而攻蠻夷然予欲靖民亦庶幾興百姓以為百姓爾其平賦斂之藝極謹調度之盈虛使金穀之問不至於廟堂庶朽

腐之言再聞於倉庾恪居官次毋重訓言

閻琪為擒獲順蕃人張宥轉拱衛大夫果州團  
練使陞充永興軍路兵馬都監權知耀州兼管  
內安撫依前統領忠義軍馬換給制

屬者敵寇犯順方華原之被圍有倅二心欲幡城而應  
敵乃因變告已即大刑封畛無虞忠勤是賴具官某出  
入行陣勇敢無前撫輯屯營恩威有護因姦謀之竊發  
爰武斷以知名事已殆而復安賊將成而卒敗載觀獻

狀良用歎嘉俾進橫列之階兼委郡符之寄益堅勤略  
以稱恩榮

呂本中元是中書舍人為臣寮上言職掌外制  
率寓已私奉聖旨與宮觀遊明堂大禮合行檢  
舉復祕閣修撰制

勅具官某以爾文詞華國篤厚裨身頃以彙征遂儀從  
列

周葵元是起居郎為臣寮上言挾私薦呂廣問

奉聖旨落職與宮祠遇明堂大禮合行檢舉復  
直祕閣制

勅以爾文行之美精於搢紳稱績之休著於臺省日干  
清議用致煩言既閱歲時省愆茲久寓直中祕稍示甄  
收往服恩章毋忘兢慎可

林季仲元係左朝奉郎中書門下省檢正諸房  
公事自陳宮觀除直龍圖閣主管洪州玉隆觀  
所犯因臣寮上言巧於身謀探伺言章之出未

及進呈之間先為詭計幸免罪去事落職依舊  
宮祠該遇大禮赦復直祕閣制

勅朕施配天之澤以一洗於庶辜憫負罪之臣用稍還  
於故秩爾早承簡拔薦抵尤違既更歲月之淹亦既思  
愆之久其從蕩宥以示甄收欽服予恩毋忘爾戒可

施庭臣元係左朝奉郎守起居郎所犯因語言  
狂率令吏部與廣南監當今該遇明堂赦恩復  
直祕閣宮觀制



勅朕待遇臣子以公議而行與奪其罪之也必有以取  
之其舍之也亦有以恕之務廣恩以略其不及無淹恚  
而疾之已甚况於姓名狀貌嘗簡朕心者乎爾頃以猷  
為擢侍帷幄不能自靖以抵罪辜惟原情之無他宜會  
赦而一解寓直中祕稍示甄收秩以真祠俾安閒逸尚  
慎吹鑿之戒無忘復玷之艱可

成閔同前除正任團練使制

勅具官某懷許國之忠驍雄自命厲殺敵之果敏銳無

前茲因王旅之脩封遂奮兵威而壓難載嘉武節俾進  
列於兵團益茂壯圖尚畢精於報國夙宵自勵毋廢前  
勞可

李珂解罷帶御器械轉團練使制

具官某參書版之聯解屬鞬之職宜頒乃寵用旌其勞  
以爾欽慎持身忠勤自力入侍帷幄既閱於歲時茲釋  
弓弣肆彰於命數爰陟戎團之秩乃先內省之班益勵  
恪恭往祇眷渥

薛昭右通直郎延安府通判因割河南故地了  
差人齎咨目與都統制李顯忠言拜赦意欲早  
為歸附委是忠義特轉右承議郎制

勅爾頃淪陷異域良非本心逮聞赦令之敷自喜王靈  
之及移書將士勸勉來歸有嘉忠誠宜示褒寵往祗成  
命毋替厥初可

楊興為岳飛奏部領官兵數十人於淮寧府沿  
河與金人鐵騎數百騎鬪敵自辰時至申時殺

敵退走殺死金兵數人傷中數多其楊興雖左  
臂中六箭入骨猶堅力向前並不退却委是出  
力轉武翼郎兼閣門宣贊舍人制

淮寧之役爾與寇确短兵既接而方奮金鏃次骨而不  
言既懷徇國之心寧復旋踵之計有士如此敵何足虞  
原致汝之夷傷諒由予之不德載觀獻狀良所歎咨雖  
嘉衛社之忠重軫納隍之愧其峻陟於武爵用昭示於  
恩光往其欽承益思蹈厲

宋林等為自來訓練武藝比拍得事藝高強弓  
馬精熟累經戰陣諳曉出入轉武翼郎換給制  
勅某等有司言爾等便習騎射久更戎行申錫命書俾  
階武列尚思奮厲圖報國恩可

張伯望為殺獲虔賊劉宣等轉修武郎制

爾頃跡捕姦宄進官一列申錫命書以為爾榮尚勉之  
哉毋忘勤力

綦辛為隨張浚至關陝轉秉義郎又因措置軍

期事務普轉授從義郎又因三泉縣捍禦轉修  
武郎換給制

勅爾頃以積勞薦陞秩序申放書命以為爾寵尚思勉  
哉可

向世章為掩殺桑仲賊衆得功轉承節郎并部  
押義軍赴宣撫司轉保義郎換給制

爾頃以捕賊有功應賞申錫書命祇服官榮

起居郎舍人制

論語以言動皆由於禮而天下歸仁易以言行皆止於善而千里為應況於承統業之重託士民之上言而民以為法行而民以為則者顧可不慎哉朕東才能以自近庶言動之無違以爾具官某操行之美稱於士林績用之休見於累試簪筆侍殿莫如汝宜舉而必書以授太史豈徒欲樞機榮辱之本致慎蓋將使尚書春秋之法復嚴勉服訓言以永多譽

宮正張金奴轉郡夫人制

朕妙選良家備充後宮之列分釐庶務助成內治之嚴  
具官某氏靜順流風柔毓德擢居尹正之職具著夙  
夜之勤用錫號於小君仍疏封於名郡勉圖恪慎思副  
褒嘉

陳氏封郡夫人制

朕設內職之員備後宮之務參華宸掖妙選良家某人  
祇事恪勤律身柔靜密奉禁嚴之內實宣夙夜之勞宜  
荒名郡之封俾正小君之號往欽茂渥益懋溫恭



何岳為部領義兵有勞轉保義郎換給制

爾頃奉職關陝卓行殊遠申錫書命慰爾勞動

韓仲通大理御制

具官某理官典國五刑務就居之克允廷尉名家三世  
由法律之持平已試可觀敘遷惟當以爾稟資通亮涖  
事審詳周旋棘路之班究心讞議參贊秋官之治著績  
郎曹逮陞亞卿益無留獄因能而任進長厥僚體予欽  
恤之懷懋爾平反之意毋深文以為察毋縱吏以為寬

時乃之休同底於治

又許大英大理少卿制

具官某朕三覆示木行之仁五刑取天數之中專職掌  
於大理方疇咨於亞卿以爾更事為多持法甚允翺翔  
棘寺備見哀矜參贊秋官訖無枉滯載嘉績用進貳廷  
平惟法家者流不至於寃民則天道之報常在於陰德  
往思汝守其體予懷

磨勘制

朕考績於三載之際定為小滿之期詔爵於八柄之先  
蓋示大公之義雖居法從不廢彝章具官某學術淹該  
吏能膚敏擢自道山之任峻躋郎省之榮簪筆螭坳代  
言綸掖粵從真館起涖輔藩就守紱以再留因其治效  
課吏銓而序進積以年勞茲率厥常用增爾秩往祇光  
寵益勵猷為

正顯廟封侯制

惟神夙著惠政懷於一方遺愛流傳廟食殊久凡雨暘

之所禱皆響答而感通功既及民可無褒典錫茲美號  
寵以侯封永孚靈休副我顯渥

--	--	--	--	--	--	--	--	--

欽定四庫全書

紫微集卷十八

宋 張嶠 撰

制

王俊為統兵收復陷沒州縣與賊交戰大獲勝  
捷轉履正大夫武勝軍承宣使制

勅寇為不道荐流毒於我民士有壯猷用克綏於吾圉  
惟時命綍可後疏榮具官某驍果為資本山西之風俗  
戰伐自奮擅塞下之威名每懷敵愾之忠卒建禦戎之

績覽觀獻狀良所歎嘉俾進陟於橫班且遙分於留務  
十年生聚方迎天節之丕一日縱敵尚慎古人之戒益  
思厲勉嗣有褒陞可

王勝同前除正任承宣使制

勅具官某懷許國之忠驍雄自命厲殺敵之果敏銳無  
前茲因王旅之修封遂奮兵威而壓難載嘉武節俾進  
列於承流益茂壯圖尚畢精於報國夙宵自勵毋廢前  
勞可

王德馬立為收復宿亳州等處立功並除龍神

衛四廂都指揮使制

勅疆場之邑雖彼此之何常封爵之科惟優饒之是務  
具官某秉資沈毅挺志忠誠累立戰多遂高勇爵比從  
偏師而出復收二郡以還曾未淹時已聞淪陷顧彼州  
來之所在一何介於予衷故如置楮之有言亦不忘於  
爾報俾參華於部督尚計效於方來勉圖異等之功以  
慰國人之望可



王進為元係振武指揮使累年教閱委是整肅  
降等換承節郎換給制

勅爾頃由軍校以魚麗鸛鷖之法訓齊士卒有勞中率  
遂齒階列申放書命毋替爾勤可

解元先入京東親率軍馬往沂州沭口迎敵烏  
珠見陣掩殺實立奇功除龍神衛四廂都指揮  
使制

勅偏師薄伐既收略地之功舍爵書勞可後踰時之報

第其等級行以贊書具官某懷許國之忠驍雄自命厲  
殺敵之果敏銳無前茲因王旅之修封遂奮兵威而壓  
難冠秩廂部其參營衛之華總衆邊陲尚賴折衝之略  
祇承明命益勵壯猷可

中書舍人制

朕覽觀三代兩漢之書嘉夫渾灑深厚之制能使一時  
典章政事之美見於號令言辭之間將資行遠之文以  
為飭治之助思以是任付畀得人以爾具官某以文辭

秀於士林以論議儀於禁路道前世之載能潤色於王  
猷處當世之宜能彌綸於衆務肆命以予言之代將必  
稱所居之官昔鄭子產以善辭令而稱於諸侯觀射父  
以道訓典而重於楚國矧以綸綍之重鼓舞四方豈徒  
見命令之修必足為政理之賴勉祇厥服以稱厚恩

王忠植為收復石州等十一處近因將帶軍馬  
前來會合到延安府被叛賊趙惟清囚執要拜  
金國詔書忠植毀罵惟清遂將忠植解赴金國

元帥府元帥道你拜我四拜却與大官做忠植  
毀罵元帥又道你只拜兩拜忠植亦不肯元帥  
差甲軍監忠植到慶陽城下忠植道我是河東  
步佛山忠義人被趙惟清捉了解赴元帥府要  
忠植來招本府不要負違朝廷堅守城壁忠植  
只死在城下番人却押赴元帥府元帥問所說  
言忠植自袒剝下衣服掀開胸前道你與我快  
死遂刺死特贈奉國軍節度使開府儀同三司

仍賜諡制

勅朕顧瞻中原念侵疆之未復選任將帥方闢國之是謀豈圖臬俊之臣忽動鼓輦之感其推愍冊以勵庶工具官某奮身阡陌之中雅意功名之會忠壯殆其天賦韜略本於生知越歲未淹徹聲已茂糾虔義旅居多於景從傳檄列城已聞於風靡天為不弔人忽淪亡孰云貔虎之資遽陷敵人之計臨孤城而厲衆寧反解揚之辭蹈白刃而不回益抗杲卿之節覽茲赴告深所悼傷

是用追褒齊越之雄視秩宰司之峻易名而節惠延賞  
以字孤具嚴廟貌之崇併示哀榮之渥嗚呼刻鮑信而  
旌義烈豈但無慚斬士政以慰忠魂其將有日諒猶未  
泯尚或能歆可

潘謹燾係迎敵金兵掩殺入河大獲勝捷內有  
陣没人欲贈遙郡防禦使制

勅奮身而犯鋒鏑本以輸忠殞命而徇國家至於死義  
念立節之如此顧恤章之可忘具官某蚤以沈雄驟登

勇爵果於犯難卒殞顏行即其橫列之崇榘以捍防之峻尚其不昧宜克歆承可

郭閏係前知洮州因男從政狀昨人馬侵犯糾集百姓王德等送臘彈結連熙秦統制關師古有外地熙河經略慕洧生疑以此拘管斬首乞恤念父親忠孝乞推恩奉旨於武功大夫上特贈遙郡防禦使制

勅朕不愛高爵重秩以旌忠義之士生有榮號死加愍

冊所以為臣子之勸也爾頃以輸忠本朝遇害姦逆今其孫子能以狀言立義不侵雖古何愧其需飾終之贈驟躋禦侮之階尚其有知歆予顧恤可

桑彥修為金人侵犯華州日歿於王事贈承務郎與一子下州文學制

勅具官某爾頃因守禦城陷沒賊既加閔典且錄嗣人尚其有知欽承命渥可

胡存等二十五人邢順等一十三人崔平等十



二人王琳等十九人田立等十二人王叔等四人謝青等四人為與賊接戰陣歿並贈承信郎制

爾等越自行間挺身死國載觀忠壯良用盡傷其並秩於武階用追榮其營魄

巨麟係虢州略縣尉因金人侵犯本州同都巡張志前去把截不期張志叛用鎗刺死麟麟贈承信郎制

勅爾頃奉簡書捍賊於境豈期共事實有獸心遂殞厥身良可傷盡武階納禭尚歆享之可

齊萬等田塚等係城父縣及南京下邑縣等處  
迎敵金兵殺敗賊衆所有陣亡人欲贈承信郎

制

勅爾等北與敵確殞命戎行嘉其死國之忠宜有追榮之典其旂書命禭以武階精識不渝尚服予寵可

鄭挺為自行在至關陝道途萬里備見忠勞轉

承信郎換給制

爾頃奉職關陝卓行殊遠申錫書命慰爾勤勞可

裴信翟文簡范廣各贈三官王勝蘇卞各贈兩  
官秦通等三十員各贈承信郎制並係與金人

見陣陣沒

勅具官某等爾等退敵於陣不避死亡金鏃淫夷卒至  
淪沒惜無萬金之藥可全爾軀庸霈九原之恩以將予  
意忠誠未泯尚服官榮可

祝次齡王穗邵從陳生為與海賊戰歿祝次齡  
贈兩官外餘贈承信郎各與一子恩澤制

屬者海寇蟻結震擾齊民爾等捕逐殞於鋒鏑可無褒  
恤以慰營魂既追賁其官資且收錄其嗣子尚其不爽  
服我恩榮可

劉青贈忠翊郎劉又贈成忠郎張浚等贈保義  
郎宋俊等贈承節郎吳慶孫通等並贈承信郎  
制並係掩殺金兵陣歿

勅具官某爾等咸以下秩捐軀國事載加忠壯良用盡傷並錫官資追褒泉壤或加贈襚以示哀榮尚其有知歆予休命可

蔡扶孟甲為游說陝西帥臣河北忠義之士被金人覺察得知已被處斬各贈奉議郎與一子恩澤制

頃有義士深蹈虎穴遊說淪陷之衆導之以正不幸殞於非命既以隱恤其終矣迺者大將言爾等向者之役

實為少從何可不報也哉並追賁以通籍且錄官其嗣人尚其有知歆予褒恤可

呂言為管押錢糧隨軍應副支散被謝二花賊徒殺傷身死贈兩官與一子進義校尉制

爾率職供軍殞命賊手既加褒恤且錄嗣人尚其有知歆承明命可

董福贈承信郎與一子父職名張宣與一子進武校尉制並係與金人接戰陷沒制

爾頃與敵戰歿於行前死事之節不可以莫之酬也既  
追責其泉壤又恤錄其嗣人尚其有知歆予渥澤可

曹深為因差出催發入禮錢物督捕盜賊在路  
被兇賊謝五軍等殺戮身亡贈兩官與一子進

義副尉制

勅爾率職在途殞命賊手既加褒恤且錄嗣人尚其有  
知歆承明命可

感德軍節度使高世則故祖母郭氏可特贈陳

國夫人制

勅朕謁款上帝以迪于保之休祗見祖宗克篤傳序之慶不敢專鄉其美用將敷錫於民矧吾外氏之親可後均釐之典具官某故祖母某氏出自冠族具聞儀訓來嬪戚畹益襲令猷謹蘋藻之供春秋不懈奉珎璜之節動靜以時已錫號於封君茲更荒於賜履欽承命綽永賁宗桃可

故祖母王氏可特贈韓國夫人制



某氏被服圖史恪謹蘋蘩處富貴而無驕侈之風齊閨  
門而有肅雍之美胙於成國已正小君之名荒以大邦  
益衍脂田之奉惟其精爽尚克嘉之可

故母楊氏可特贈鄧國夫人制

勅朕練時日以修重屋之義既蒙嘉應均福釐而被四  
方之遠以迪惠心顧輝胞畢待於下流矧肺腑宜膺於  
茂典具官某故母某氏柔儀婉孌令德幽閒躬采蘋法  
度之防致鵲巢積累之盛併襲餘慶以啟後人胙淮海

之封已正笄珈之位賜吾離之履益荒湯沐之畚祇服  
明綸永光廟室可

故妻魏氏可特贈衛國夫人制

勅朕有事合宮神祇並况既推配天之澤以寵賚於周  
行又廣漏泉之恩以閔仁其既歿汪濊之施幽顯被焉  
具官某故妻某氏為婦為妻皆合於禮典宜家宜室並  
著於閭儀雖秉德甚休宜膺於壽嘏而賦命不淑久隔  
於存亡其易故封更荒大國尚歆渥澤以慰幽扃可

妻周氏可特封福國夫人制

勅朕惟國朝母后之家皆應壽寵若乃宣仁功德之盛  
覆被本宗故其後人冠族不墜至於保宜家族致位將  
相不馮貴以傲物不恃寵以干澤雖承世德之教惟其  
家室亦有助焉具官某妻某氏山河之德稱其象服柔  
正之行克相夫子逮茲祭澤之廣宜膺褒寵之榮俾開  
大國之封益峻小君之號訓爾孫子毋怠厥修可

保慶軍承宣使士会故妻郭氏可特贈碩人制

勅朕惟人臣之於室家生已共其甘苦歿則致其哀榮  
况吾馨維之親豈無伉儷之念廟澤之施追賫可遺具  
官某氏山河之德稱其象服柔正之行克相夫子宜加  
愍典增美號名精識不渝尚知歆享可

故妻郭氏可特贈碩人制

具官某故妻某氏秉德幽閒凝姿婉孌當其既笄而  
承父母能盡於女工執饋以事尊章遂成於婦順其錫  
贊書之茂俾增稱謂之隆尚其有知歆承褒恤可

故妻鄭氏可特贈碩人制

勅某氏行不越於閭彞德足書於圖史早以令善歸于宗支克躬蘋藻以承祭祀宜加恤典以示褒榮增賁嘉名以光廟室惟其知氣尚或能歆可

龍神衛四廂都指揮使張中彥妻甯氏可特封碩人制

勅朝廷遇臣之章位高則寵渥人臣事上之禮恩厚則報豐今廟中之澤曲加於中閭恩則厚矣其所以輔相

其夫以圖報予者獨無望於爾乎具官某妻某氏秉資  
令柔歸於良奧從夫之爵稱號益隆惟使爾夫於所以  
事國者無愧則爾益榮矣尚勉之哉可

徽猷閣待制曾統故妻張氏可特贈令人制

勅朕穆卜季秋大稱禋禮發明號擁神休以與海內同  
函蒙之福顧吾甘泉之舊夙資內助之勤可無追榮以  
慰幽窆具官某故妻某氏行不越於閭彞德足書於圖  
史早以令善歸逢其良極勤勞於室家每同甘苦殆良

人之通顯已隔存亡用霈恩章增其稱謂納書以襚尚克歆承可

顯謨閣直學士汪藻故父穀可特贈特進制

朕本秩禮以嚴天地之奉薦大樂以格神靈之和儀物備陳縕豫紛列第祿並况盼蠻豐融嘉與臣民均茲祉福顧乃甘泉之舊可稽陟岵之褒具官某故父某孝謹禋身最高鄉曲之譽恬素自守不求聞達於時修之方寸之間責報必世之後乃蓄餘慶篤生顯人文章獨行

中朝安和備於諸事早以德義為吾近臣方倚牧民不與侍祠之列式寬濡露用敷告第之章尚其可作之靈歆茲進位之寵惟爾孫子勿替引之可

試兵部尚書胡交修故父宗旦可特贈宣奉大夫制

勅朕覽觀漢唐衣冠之盛或四世五公而襲簪紱之舊或一門七業而並術藝之興孰兼二者之榮繫我世臣之後國朝胡氏江介大家爵位文章相繼不墜伯仲父



子鼎立於時蟬聯百年寄深一代具官某故父某憑藉甚厚資才絕倫稱其世德之餘綽有名家之韻未冠登名於計吏中年振業於虞庠謂當勃興繼承於世烈遂蓄餘慶克開於嗣人碩德懿文為吾法從清流雅望無愧前修迹其事國之方益見教忠之訓肆惟廟澤敷錫閔章一品崇資用褒於泉壤九原英爽尚服夫恩光

徽猷閣直學士趙霈故父峻可特贈通議大夫

制

朕肅祇明禋荷三神之錫羨肆省象魏舉有截以均釐  
豈吾侍從之臣不預寵鴻之福以吾報本之義宜推錫  
類之心乃渙湛恩以光禰廟具官某故父某材資畢給  
學行深純處已靖端莅官明恕潛德不耀莫跡通籍之  
榮陰報可期終篤有後之慶升華二品之貴以慰九泉  
之幽尚其有知歆茲褒恤可

樞密直學士陳規故父昇可特贈太中大夫制  
勅禮有隆殺惟尊者之事親得極其至若夫顯揚欲光

之意則上下同之乃者稱秩元祀登配祖考事親之禮  
無以復加矣思與羣臣共由斯義肆推惠澤俾得追榮  
其先本之以恩行之以制遠近世數惟所應得而無不  
及者焉况吾甘泉之舊哉具官某故父某經行推於鄉  
里德善教其子孫雖冲約自居位官莫極於通顯而遺  
慶於後愍章數逮於幽高秩序益崇光榮有耀刻書告  
第尚克享之可

徽猷閣待制董弁故父適可特贈正奉大夫制

勅朕裡祀合宮上儀獲考大賚四海以侈神休內外遐  
邇咸蒙嘉况矧吾侍從之舊福祚有不登者焉其放追  
命之書以慰揚親之意具官某故父某學問博洽馳驟  
千載以還文辭縱橫獨高當世之譽備先朝之法從頗  
著盡規蓄餘慶於後人終然濟美文階三品極納禔之  
至榮營魄九原尚焄蒿之如在可

故妻李氏可贈令人制

勅朕惟人臣之於室家生則共其甘苦沒欲致其哀榮

貴賤一也廟澤之行顧可忘褒賁之典哉具官某故妻  
某氏稟德令柔凝姿婉慤造行甚美夙有宜家之稱賦  
命不融中乖偕老之約增寵號名之美以為閭閻之光  
尚其有知歆承嘉命可

徽猷閣待制程瑀故父枏可特贈朝奉大夫制  
勅朕燎熏皇天舉合法之典登配祖考嚴並侑之文樂  
奏接和禮儀矜飾膺受多福敷施庶民睠吾侍從之良  
豈無明發之感其施恩渥以賁幽扃具官某故父某文

學起家經術自著仕不配德卒莫登於顯官慶垂厥後  
遂鍾美於嗣人聲震一時儀吾邇列寄深牧養不預侍  
祠之班恩不遠遺爰推禰廟之寵陞華郎內尚克欽承  
可

妻沈氏可特封令人制

勅朕惟侍從之臣入則罄論思之益出則寄藩宣之重  
顧其德義之美繫有內饋之助焉可無褒崇以風德化  
具官某妻某氏柔仁端靖孝愛慈祥為女而教不煩為

婦而家以義四德兼備宜膺令名矧茲廟澤之行可無  
賁飾之典欽承榮命無逮相承可

羅偁贈官換給制

固圍於邊久擅總戎之略喪元於陣有嘉衛社之忠其  
施閔典之褒以寵義臣之節具官羅偁材足以當萬人  
之敵勇足以率三軍之心方大敵之被圍乃整軍而赴  
難遇賊中路以沒厥身遭時多虞未遑爾恤俾陟官於  
橫列用追賁於新阡尚其神靈歆予顧報可

柳約昨係朝散大夫戶部侍郎所犯因臣寮上  
言罷差提舉江州太平觀後該赦復祕閣修撰  
係已叙未復舊職今又該明堂赦復敷文閣待  
制依舊提舉江州太平觀制

勅朕稱禋合宮肆青象魏開棄咎之路俾一洒於庶尤  
闕負罪之臣宜稍還於故秩矧乃甘泉之舊嘗詔刑史  
之書其霈恩榮以除苛撓具官某頃由材譖見被使令  
稍以寵能爰躋危從一離譴責遂闕歲時雖秩令之存



更終責言之不置茲因彝典加畀寵章超陞次對之華  
仍處真祠之逸廣仁恩之意朕方厚於臣工復玷缺之  
難尚無忘於飭厲可

劉一止元是給事中為臣寮上言挾私薦呂廣  
問奉聖旨落職與宮祠該遇明堂大禮赦合檢  
舉復秘閣修撰制

勅具官某以爾操行堅正文詞深純爰以修能遂躋從  
列自干物議用致煩言顧閱歲之已多諒思愆之既久

茲因需宥爰舉藝章稍還論譔之華用示甄收之渥

